

李石亭文集





叢書集成

初編

主編者
王雲五

商務印書館發行



集文亭石李



3 0646 3768 3

著楠化李

本館據函海本排
印初編各叢書僅
有此本

李石亭文集卷一

治姚紀略上

重修姚江崇聖宮記

羅江李化楠廷節著

男

調



姚邑學宮在南城古栢陰森傳爲宋元時物厥地宏廠前爲射圃後爲明倫堂尊經閣由戟門以東崇聖宮在焉按崇聖宮卽啓聖祠啓聖晉封爲王並王五代仍以宮稱且以別于向者之專祠啓聖也歷年久宮墻半剝雖得前任張令及今司諭周君協力修葺僅完治正殿兩廡張適奉調遂不果修瞻拜之下棟宇傾頽風日不蔽至聖之所未安卽司土者之所未安也爰以今春筮日鳩工廣狹以地限而榱楹之制崇加于舊三尺其下鋪磚取平取燥墻垣窗櫺舉非其舊學之規制於是乎稱曩之官於茲者至是竟克有終焉姚江固人文淵藪學宮實文運所關後之人克嗣余志以時經理而適新之于以妥五王在天之靈開茲土文明之運豈不休歟

重修姚邑先農壇記

縣邑之祀先農自雍正年間始蓋卽古者祈穀報饗之義以成民而致力於神也壇必在縣之東以迎春氣祭必用三月取順農時其神曰厲山氏神農氏后稷皆先世有功於農者祭之日農夫播穀縣令親秉

未爲百姓先。典葦重哉。姚邑邇年百事隳廢。余始至。肅壇行禮。見夫廟傾墻圯。神無片瓦之覆。祭當耕籍。則田在水中。農夫牽牛九轉。縣令拱手旁觀。報曰耕畢則退。嗚呼。以是云耕與不耕等。余旣捐俸重修堂宇五間。治墻垣。正壇壝。乃與農夫約。祭之先。務平治藉田。去積水令燥。至日。余親扶犁九推。農夫播種。使百姓觀者知農事至重。不可嘗以怠。是則余殷殷勸農之本心。冀以是迓神庥而福兆姓。敢曰我共奉行故事也乎。

姚江後清橋落成碑記

後清橋適當餘姚後清門。後清門者。城北門也。實臨劍江。通海潮。明嘉靖中。撤橋以絕倭路。城得完。後起建。則改河橋爲平橋。繼圯于萬歷中葉。乃重建洞橋。其地勢東下。潮之來也。猶緩。其退也。三路水盡。束入橋。甚鬱怒。船之西北來者。其奔如駛。稍不戒。與橋擊撞。船破而橋亦損。歷年久圯。石落水過半。往來病之。乾隆十二年三月。有紳士倪繼宗。公舉藏經寺住僧曰重新者爲董事。募修此橋。邑令陳據以通詳。得請矣。不果行。越二年。奉憲檄飭查議。邑令會報以現在設法勸捐。然捐究不至。六年辦災。其明年六月。余洩任。邑紳前後捐助賑銀一萬三千餘兩。至是尙餘銀九百七十兩。詳充城垣衙署祠宇橋梁公用。合以已捐未繳銀一千四百兩。亦聽催收濟用。數稍廣。然衆功並舉。又不敷。是時也。潮益爲害。橋工益急。爰酌議具詳。先儘橋工。動用。急民事而後官衙。以乾隆十七年十二月二十日。得各憲報可。卽發存庫銀如數。交僧旣鳩工伐石而已。捐未繳之銀亦集。以十八年十二月十五日橋成。前後約費白銀三千五百兩。有奇。

尙餘捐助銀五百餘兩。益之以別項公費。自城門至橋所。砌築石塘若干丈。以便行人。以順潮路。是橋也。工閱七載。前此購料。早費千金。因募化無出。半係重新解囊。該僧品高行潔。樂施好善。自興工以來。無日不在工所。余賴其力以克有成。橋舊在城門口。今東移二十丈。用殺潮勢。高逾舊洞。惟三云。

剷復燭西東湖記

東湖分燭溪之上。原灌梅川田六百餘頃。建閘啓閉。厥利至溥。有橋曰航渡。近山麓。水勢紆緩。故其內多漲沙。農民以其無碍灌溉也。而開墾且報陞輸稅焉。閱時既久。迤邐委輸。橋之外沙土漸積。湖身日隘。私墾私種者紛如也。己巳夏旱。梅川民需水孔殷。啓閘罄放。因羣致怨。夫墾田之人之阻碍水利也。一言詬訛。釀成聚衆巨案。累月經年。干連者強半在城。余接任勘審。檢志乘。溯源流。竊謂故甲不申。勘禁不早。官其地責耳。貪小利。忌遠猷。小民何知乎。會鞠既定。航渡內外。分別剷復。爲善後策。商諸委員趙令。附末議上之。得嘉許焉。會郡伯舒公新蒞。因西湖案。并請勒石。繼自今。豐碑屹立。古制不磨。湖之水。其源源不竭也夫。

禁墾燭溪湖記

燭溪爲姚江巨浸。居獅子磨盤諸山之麓。梅川龍泉等都田畝。環列如繡。灌溉資之。明成化中。建閘築塘。以均茲湖之利。其上源曰東湖。下源曰西湖。歷年既久。沿山近塘。多浮漲。湖之民。漸次墾治。而原所既田。幾涸。於是互相爭奪。東湖之獄。既成。西湖之訟。復起。刁民上控。大憲委勘。飭議。羽檄紛馳。二十餘年。或請

壑。或禁壑。案如轆轤。謀同築舍。余抵任。揀卷。其東湖着上虞。令會勘。其西湖則獨余勘也。既遵委會勘。東湖案。隨獨詣西湖。察形勢。喟然曰。是湖而可壑也。是無梅川龍泉等都之田也。前之議壑者。何心哉。遂立請于憲。蒙郡伯親勘。勒石永禁。後之人享是湖之利。敢忘所自哉。

歲修海塘記

海在治北四十里。自上林至蘭風七鄉。地悉瀕海。海水壯薄。海鹽通定海之蛟門。西過纂風亭。入鰲子壑。通錢塘江。橫亘八九十里。其產魚鹽蟹蛤稻黍菽麥瓜蔬木棉蘆葦。諸鄉小民生業其中。然海壩鹵脆。潮流溢決。數十里地。爲海所漸。駸駸入內。蕩民居。害嘉穀。前民苦焉。宋慶歷七年。縣令謝景初始作堤。捍海。其後施宿。葉恆。胡復。周進。相繼更建土石等堤。東起慈谿之洋浦。西接上虞之烏盆。袤長二百四十里。有大塘。新塘。周塘。潮塘之別。歲久不治。至國朝雍正初年。諸塘皆廢。獨大塘存。而坍損過半。潮患復不足禦。縣令葉瑄文。以大塘外淤地。可壑爲田。乃自洋浦迄馮東干墩路一帶。勸民捐築土堤。名榆柳塘。雍正十二年。張令永熹。又於榆柳塘外。勸築利濟土塘。亦自洋浦起。未至臨山。而與榆柳塘接。以此層次保衛沙灶地畝。民得收海塗之利。顧旋築旋坍。海潮仍爲民患。乾隆十二年七月十四日。潮忽大至。淹沒民田四五萬畝。漂流民廬舍器物。不可勝計。前任王令詳請帑一萬七千五百餘金。着各灶承領修築。兼爲災黎餬口計。謂之以工代賑。工未竣。王亦謝病去。先是姚治燭溪。最爲民害。乾隆十七年。府君初到任。會當防秋時。雖匆匆補築。未善也。會七月十六七八等日。颶風挾雨大至。吹屋瓦。坍廬舍。拔樹木。三晝夜不止。余

惶恐戰栗，乃跪庭中，祝曰：窮地窮民，甫離災難，嗷嗷待哺，若天不降康，堤潰水溢，民其爲魚，水旱頻仍，罪在長吏，願身受罰，爲此方黎庶延殘喘，祝畢，夜方半，隨喚幹役數人，分頭查看，天微明，廟山司巡檢俞漣馳報，海水幾潰堤，賴西南風大作，潮爲卻，塘雖損得存，聞是心稍安，今年六月十三日，余親至塘所督工，摘拘民灶之黠而玩者數人，枷責示儆，餘皆拊循而噢咻之，未匝月，塘之傾圮者皆完整如初，竊謂秋汛若大，差可恃以無恐，而潮竟不至，查姚邑海塘，原係民灶自修，官爲董役，願行之既久，不無地棍包攬科斂之弊，茲蒙撫憲覺羅雅議奏，坐塘田每畝捐錢四文，官爲修築，奉旨報可，通行勒石飭遵，查坐塘田共計一十三萬一千一百三十二畝零，歲計捐錢五百二十四千五百二十八文，司其事者，苟能以真實愛民之心行之，自可永免潮患，又聞潮汛之大，在七月望後廿前，過此五日，雖有潮不爲害，塘各有專司，杜家三管理上埋下，係三山司巡檢董築，柏上柏下，典史董築，而梁上梁下，以及馮東馮西，則俱廟山司巡檢轄也，初余督工海塘，由東而西，至梁上界，居民負畚揭爭先取土，絡繹不絕，蓋由廟山司巡檢能以身率民，民樂爲用，故不賴督責而工成，余實嘉賴焉，因并及之。

禁墾小渣湖記

渣湖有二，在上虞者曰大渣，居民開墾爲田，其下爲小渣，界餘上二邑間，周圍七里，隸上虞者十之七，隸餘姚者十之三，北納蘿碧蘿巖諸山水，以蔭溉民間，其東南小穴坵頭東塘角等，湫承而洩之，又有張年湫大湖門引湖水入運河，溉兩岸田畝，兼通舟楫，利行旅，爲寧紹衝，依古然也，雍正十三年，虞民旣開大

渣因并開是湖以自廣。則有李宏遠等上控。藩憲批委山陰上虞二縣會勘。當經二令妥議。詳請勒碑禁墾。結案。至乾隆十三年。虞民姚明立、周文彥等復藉墾荒為名。紛紛報陞。署縣蔣以為湖之東身已成高阜。不開為田。棄壤可惜。遂上其議。奉大憲批府覆核議詳未結。乾隆十五年。上虞李令餘姚魯令會勘。得小渣承受大渣上流之水。以資灌溉。宜蓄洩開濬。則旱澇無虞。淤塞則有秋難望。墾田未便。上大憲以前後兩詳互異。飭委嵯縣會同餘上確勘。值災務殷忙。未果。余抵任後。檢卷關同上嵯二令。詣湖所查勘。上邑趙令以為湖身隸虞者七分。而溉田之利。姚民收之三倍。捐虞沃土以利姚。輿情未協。如蔣前令詳許開便。余曰。斯湖若可廢。古人有先之者矣。姚邑雲樓都之田。皆仰溉於是。若何廢之。况虞民並有田在湖下。姚民病則虞民亦病。其罪害均也。前此大渣新開。隱佔過半。至今未楚。開湖之議。未必果有利于國。先貽無窮之患于民。不可。會委員戴令意與余合。遂定稿詳憲。批飭永遠禁墾在卷。斯湖之存。案積廿年。勘經七令。豈偶然哉。豈偶然哉。附請禁墾小渣湖詳文。勘得上虞縣民人姚明立等認墾小渣湖案。緣是湖坐落上虞地方。比隕諸山之水。盡歸於湖。由湖南出。下達運河。以至下壩。計十八里。悉賴此水通行舟楫。而姚邑雲樓都之田。又勢處低窪。尤賴虞邑七分之水。瀉入灌漑。是茲湖之大有裨益者然也。今查湖之東。半皆淤漲。若墾成田。計可千餘畝。但姚明立等止知目前之利。不思湖墾為田。其利在虞。而害已歸姚。職等奉委。細勘情形。此湖若墾。勢必填築出陸。多開溝壟。湖身狹隘。遇水大必至漫溢。而低處鄰田。盡為澤國。水小則各處蓄閉阻截。運河下流之田。無處灌漑。是因千餘畝之新墾。而絕姚民數萬畝之水道。事之斷斷不可者也。又況十八里運河。雖曰通商。而兩岸之田。均藉是水斗屏。利姚亦以利虞。尤不可絕其源以致乾涸。是以雍正十三年間。經前山陰劉令上虞鄒令會勘。請禁閉墾。奉前督撫院程批。飭勒石永禁在案。茲卑職等會同確勘。實屬有妨水利。應請仍飭禁墾。其淤漲之地。概行疏通深濬。以茲蓄水。好民不得妄生覬覦。緣合將勘查實情形詳覆。伏祈憲核。

禁革庄書積弊記

姚民投遞呈詞。每日至百餘紙。關田土者十之六七。皆緣細號不符。糧額不清。豪強志在兼井。而胥吏因緣爲奸。余始至。清理塵案。知其弊皆在庄書。蓋分管者至有四十人。吊其冊或不時至。乃云賚往鄉間。其情弊尙可言耶。竊思實徵必以推收爲準。推收必以印契爲憑。而契之有印與否。必于推收時查驗。今產業過割。官不與知。庄書惟利是嗜。無論印契白契。概予收除。甚至藉詞出嫁。詭捏分單。無契者亦得推收。種種詛妄。不可枚舉。故有田未賣而號已無存者。有田已賣而號猶兩頭生根者。有幾畝幾分而減爲幾分幾釐者。有幾分幾釐而加爲幾畝幾分者。田多號少。則將亡其田。田少號多。則倍輸其賦。愚民傷心飲恨。莫可誰何。訟所以積而日多也。余旣知之悉。卽于是年冬詳請大造。得各憲報可。閱一年。冊成。內載田地山蕩共七十二萬一千三十五畝五分零。統計歲徵銀七萬四千四百六十六兩五錢零。米二千五百七十二石一斗五升零。歲折收銀三千八十五兩四錢七分五釐零。通共銀米折實徵收銀七萬七千五百五十二兩有奇。計冊五百九十三本。吊存內署。另點庄書八人司其事。屆推收期。依法妥辦。事畢交下手庄書。年更年換。不許積充。仍將飭禁緣由。報明各憲。勒石永禁。茲役也。正田號清糧額。豪強不得兼井。胥吏無緣滋擾。數美咸具。息訟寧人。端必由此。可以治姚。卽不僅治姚。余故爲之述其略。俟後之君子採擇焉。

附請禁革庄書詳文。竊惟任土作貢。治世之常經。撫字催科。有司之專責。經理之法。務須先清田賦之本。井田闢里書之積弊。而欲以殷戶清其源也。旋於雍正十二年間。奉前督憲程飭行。殷戶不可復用。將所管冊籍追齊。交給庄書辦理。嗣蒙憲定。各庄書務務擇誠實畏法請練書算胥役。於七八月推收之後。年更年換。倉點承管。歷久遵行。各在案。惟是數年來。知姚邑者。正畧迭更。倉點庄書。如同奉行故套。以致陽奉陰違。積弊分管。且因前令曾有飭。令原點庄書。齊同戶糧架三房。有名書役分庄經營之。該各書視同世業。職於上年到任後。卽當七月推收之期。追事竣吊冊

稽查。察知民間田賦不清。收除多舛。斷難因循陋習。用是於口切敬陳末議。案內詳請大造。數月以麥。嚴督庄書。遵照條款。詳細趕辦。幸已告竣。仍遵憲行。於諸練書算之書辦中。嚴加甄別。慎選庄書八名承辦外。伏思庄書多則奸良不一。經管久則積弊難除。册存書手。則偷收偷付。任意增刪。卽至告發察究。亦已事後追求。是以列憲立法。務令年更年換。算書八名。經管妥辦。以力杜弊混。今若奉行不力。則糾紛錯亂。不難於清釐之後。復見混淆。職業將造歸戶册。督令各庄書經算清楚。悉行吊存內署。現着新點庄書。分庄覆核驗算。次年糧額。繕造實數各册送核。其從前積懸之書。悉行斥退。至民間買賣產業。向例收稅之後。赴庄書驗契推收。照每年七八月設局之時登册。該書如有執契收戶者。夾契送核。卽令收付局竟。仍將歸戶册繳署。不許滋弊。永遵年更年換章程。不得於八名之外。私設暗分。嗣後并將歸戶册造入交代。查照力行。庶幾歷任知所遵守。而賦源可清。弊根可拔。然非詳請立石永禁。誠恐日久法弛。未免乘機淆亂。理合備敘。詳明。伏候憲示。

姚邑各汛營房記

姚邑古稱用武地。明洪武二十年。大將軍湯和略地至東浙。以茲土要害。宜循重兵。制險塞。乃命千戶孫仁。增治塹堞。又于北邊置衛所巡司。二十里一城。以備倭寇。嘉靖間。倭警逼。各鄉震恐。咸入保邑。不能容少。保呂本切維桑之急。請更于江之南設城。姚遂有兩城。我朝順治十五年。增南北城各五尺。康熙二年。於沿海設立砲臺。用衛縣之西北鄙。而倭患遂絕。四十六年十一月。匪徒張君玉等騷擾慈谿。上虞。餘姚等處。時則大嵐山上馬崗練總馬預備實與其謀。大嵐在縣治南界。連鄞奉兩邑。離坡一百六十里。山深舊密。舟輿莫能至。土著者類皆蠢愚。奸徒煽惑。易以搖動。故自逆黨伏誅。大嵐遂爲重地。移總捕同知紹協右營都司駐劄是山。防叵測也。外則中村。梁衝。北溪。三汛汛官各一員。均扼要隘。爲犄角勢。而沿海之趙家臺。崔家臺。謝家臺。以及曲塘。道塘。勝山。墊橋等臺。黃家路口次。設兵防守如故。其周家路。水師。巡察海洋。尤稱要汛。沿江則都家灣。接待寺。曹墅橋。下壩四汛。當寧紹之衝。又賀墅港。五車堰。方家崗。燭溪湖。

姚家塾。皆爲巡鹽而設。南城無武官。北城有城守二員。又觀海衛防汛一員。周巷一員。澗山廟山各一員。皆屬大嵐都司所統。兵共一千一十七名。分守險要。緝盜逃民。以無恐。第各汛營房。年久不無坍塌。又叠遭風災。往往瓦敗垣頽。致弁兵棲身無地。余竊憂焉。以狀白憲。蒙題請發帑。兵可百年不用。不可一日不備。操練約法。雖有專司。而治舍宇。謹斥堠。使兵無露處之虞。得以盡其捍衛之力。則守土者責也。姚之兵數。視他邑獨多。控山防海。亦視他邑爲更要。營房以時修葺。蓋可忽乎哉。

訪拿賊窩記

姚邑賊案。視鄰縣獨多者。境西南多山。東北臨海。山之平衍可田者無幾。居民率多斫茅柴。販筍尖。以爲業。海濱則自大塘外。俱屬浮塗。莫施耕種。生其間者。駕小舟捕魚。乘潮退。捉土。跌資以餬其口。計小民一家。老幼數人。而其業止是。又或爲人傭作。往往力勤而直薄。果其腹不能顧其家。嗚呼。此賊之所由多也。夫賊必有窩。窩必皆本地豪右。而窩主庇賊。必皆倚捕爲長城。捕與窩與賊。串同一起。而于是乎牢不可破矣。余去夏來治姚疆。點視獄囚。披閱案牘。賊之未經弋獲。與雖獲而首犯在逃者。約計百有餘案。而村庄小民。之以失竊報者。且纍纍而未已也。因喟然曰。設官所以除盜。除盜所以安民。散數百十虎狼于野。吮其膏血。被害者日呼號望救。而長官若瞽若聵。而不知申焉。用此長吏爲。乃銳意振刷。立比期。懸賞格。以懲以勸。行之半年。而小賊頗多就擒。其黠者依然漏網。因思緝賊之權。不可專委捕快。就各案中。摘錄賊之猾而難獲者四五人。密書差票。夜喚皂隸李兆。民壯樓恩至內署。出票袖中而諭之曰。案賊某某。現

潛身境內。爾果能依限擊獲。則受上賞。否。革役。二人唯唯退。不三日而積賊景三擒至。內外莫有知者。又十餘日而逸賊張子顯、張文紹、陸通儒、鄒士元、繆永年、孫善平等先後就擒。余曰。此二役之功也。坐公堂。賞花酒。給銀廿四兩。或十二兩有差。旣而研鞫各犯。備得屢次行竊。及賄囑勢豪串捕。庇縱各實情。當卽差拘州同楊某。捕快楊某。錄供通詳。革審。分別絞軍流抵罪。自此而後。各捕頗知自効。賊案亦漸減于前。余之心至苦矣。而余之心亦慰矣。雖然。此特治其流耳。泝其本原。賊所由潛踪匿跡。皆里隣爲之狗隱。稽里隣法。莫善於保甲。保甲行。則宵小無所托足。此又戢奸之本。余之所以日夜熟籌而思所以安良之善策也。

李石亭文集卷二

治姚紀略下

姚江書院志略序

書院之興廢。人才之隆替。所關也。故近自督撫大吏。以至州長邑宰。興教勸學。莫此爲先。姚邑江山明秀。靈潮吐納。浙東精華。於是焉聚。竊怪茲土。自文成。戴山倡學。天下望景希聲。居然濂雒。闕復出。若其一時忠孝節義。動如黃忠愍。劉戡山。未可一二數。時科第之盛。今所見烏頭鷗。吻踏獅。怒貌者。皆昔之朱門華貴。而百餘年來。風流衰歇。弦誦無聞。何其衰也。子衿靡恙。誰爲振其惰窳者。而開其聵瞶乎。城南故有姚江書院。墻屋頽圯。有田若干畝。爲主者侵漁。前令莫能治。而城北有信成書院。係乾隆九年。爲前蔣令改僧舍而爲之。蔣去而院事亦廢。何者。無法以永之故也。夫無田之僧舍。徒矜一時美觀。輪流乾沒。藉口歲修。有費。實無片瓦加增。至使人徘徊茂草。欲問向者講學之規。輸產之盛。而故老遺民。皆無在者。無怪茲邦風會之日降也。客秋因公至邵宅。檢架有藏板。知爲姚江書院志略。念非一家之書。而一邑之書。因攜歸署。命工刷樣讀之。始信昔之鄉先生。前繼文成。戴山之後。勵品敦行。見性明心。及公產一絲一粟之出入。會聚一飲一食之贍給。勾稽劈畫。具有法程。嗚呼。豈料後之人。荒忽不復措意若斯哉。則茲書之出。有若或使之者。得非文成之靈爽。不泯於在天歟。又剝盡將復。風會之轉移。此其朕歟。夫獨創爲難。而補

缺較易。因捐俸修之。鳩工築之。浹辰之間。而奐然改觀。講堂除之。山長臨之。未幾而濟濟多士矣。則余于此信有力焉。按志略。義田六十餘畝。今止存三十三畝。數既減半。田已非故事。隔六十年。業已無從究詰。今其存者。益之以永存。菴沒入官田。凡九畝。蓮花坊沒入官田。凡十畝。又指月菴沒入官田。凡三十畝。共得八十二畝。有零。皆開具細號。刊刻于碑。視曩者六十餘畝之數。爲贏矣。以歲充明師脩脯。擇佳子弟而教之。十年以後。人文不日起者。未之有也。方事之殷。有難之者。謂南城之田。不便歸北。此甚悞也。天下事。顧其所以用之者。公私何如耳。三四里間。自分畛域。何以忘物我。祛爭黨。距大道之公。不亦遠乎。余以爲信成云者。以爲尊信文成。殊不成語。未若直改姚江。一化彼此。斷斷之習。東遷之鄭。盍亦施舊號於新邑。邦之人有能復姚江之舊者。則移此而之彼。其亦可也。余獨慨名邦之文獻。適觀衰薊。綰符茲土。不無顏汗。又幸志略之出。適當余振興書院未及半載之內。前哲之用心。不泯。而余之用心。倘亦思所以不泯者乎。爰備書顛末。以冠其首。並開載前後歸入書院田畝土名四至。而院內課士規條。亦以附見。俾後之觀斯土者。得以考焉。

一敦孝弟

讀書務在窮理。窮理務在躬行。四子書爲日用常行設也。豈口耳之爲乎。夫子之道。忠恕便終身用之。不窮堯舜之道。孝弟卽仁。民愛物都是。而未學往往判知行爲兩途。又不知所行何者。爲當務之急。博學審問。慎思明辨。篤行五之字。皆指善而言。善何麗。卽大學三章釋至善。而以仁敬孝慈信實之。

者是也。是故父子有親，君臣有義，夫婦有別，長幼有序，朋友有信，而達道舉矣。知以知是，仁以體是，勇以強是。孟子云：君子居是國也，其子弟從之，則孝弟忠信；君子之所化，子弟之所循，非有異物也。諸生亦務於此而已。一別義利。

人品日壞，緣於義利之不明。世有慎取與、謹辭受其人者，則於立品也。思過半矣。然所謂利者，豈必殖貨財之謂，以私滅公，適己自便，凡可以害天理者，都是更精言之，則義利非必兩事，祇分其心爲己爲人。而其幾端在謹獨。謹獨者，致力於存與發之關也。誠精故明，大本既立，沛然莫之能禦。故山天大畜，則羣言斧藻，一皆輝光之日新。南征記，卽竹帛旂常，罔非民由之實際。

一變氣質

古人之學，變化氣質而已矣。十年去得一矜字，克治若斯其難也。直而溫，寬而栗，剛而無虐，簡而無傲。自虞廷教胄，惟此爲先。柴也愚，參也魯，師也辟，由也嗇。雖聖門諸賢，猶所不免，亦語之使自勵耳。諸生試自檢點，得之天，成之性，剛克柔克，佩弦佩韋，必有能明其故者。若夫言不及義，人而無儀，聖人以爲難。風詩之所刺，羣居終日，尤不可不之省也。

一究經史

兩間義理，蒼萃六經，千古成敗，炳列諸史。號讀書人，緣何高束經史，既能十行俱下，善讀經者，用朱子分年而課之法，史豈能過目不忘，善讀史者，用蘇子每讀書皆作數過求之之法。如是二十年，精通貫

串真可謂坐擁百城、指揮如意者也。

一講註疏

國家經學昭明。五經註疏各有御纂。而周易折中。出自聖祖仁皇帝睿裁。涵今茹古。苞乾握坤。當日見而知之者。安溪李文貞也。其所發明。殆前代儒臣所未有。竊怪茲土人人習易。問是書。雖老生亦莫之睹。然則所習者何物也。學使按臨考試。首重經解。蓋卽欽定之書。考其疏通淹貫與否。該生其各就所習本經。嚴加討論。臨時答問。自多針芥之契。有能兼通者。足連奪數席矣。

一通古今

讀書之法。貴乎以身預之。誦禹拜臯颺。便有正直溫良意思。誦五子之歌及微子。便有惻怛幽憂意思。可以興。可以觀。豈獨詩爲然哉。而近有強記背誦。同於嚼蠟無味者。無怪也。吾之真宰不存。安所得古人之真宰而遇之。頌其詩。讀其書。不知其人。可乎。是以論其世也。而其人之微渺。與其世之升降。正於頌讀時有若或遇之者。知者定有味乎余言。

一習舉業

文章本小道。于技未爲尊。自古以爲言。又况乎帖括。然而一縷心思。可以彌天蓋地。一腔議論。足以震古燦今。無他。比附聖賢之旨。以立言故也。在制舉之初。亦不意其道之至於是。而日星月異。變化詭奇。正使詩人之優柔。騷人之清深。遷固之雄剛。孫吳之簡切。投之所向。無不如志。然而其體不可以之不

正也。賡古以爲才，放濫以爲富。天吳紫鳳，顛倒短褐，又成寒乞相耳。

一別邪正

人藏其心，不可測度，而言者心聲，是故不知言無以知人。文辭之於言，又其精者，謂人品不於是可覘乎？姑取一二人觀之。項水心之文，非不警恍也，而安詳不足，視陶菴之雄毅慷慨，則異矣。王介甫之文，非不拗峭也，而孤曩已甚，視歐陽之委婉紆徐，又異矣。其文不蒙，而其人之邪正亦別。是故厚其儲，家人之所謂其言有物，正其心，文言之所謂修詞立誠。

一論理氣

孟子云：我善養吾浩然之氣。蓋就聖賢行事不作，浩然充塞者言之，而蘇子猶得之以爲行文之樂事。謂太史公史記恢奇跌宕，亦周覽天下名山大川之故。然董子十年不窺園，而天人對策，氣色亦復不減，而醇粹有過之者，無他，多讀書而已矣。理與氣相輔，無理則氣不行，無氣亦理不立。其間有遞相勝者，馬班之文，理不勝氣，濂洛之文，氣不勝理，而百家諸子，皆出入其間。君子與其文勝也，無寧氣勝。文勝則六朝而已矣，徒爲氣勝也，又無寧理勝。氣勝亦終自盡於八家而已矣。

一戒盈滿

昔仲虺之言曰：德日新，萬邦惟懷。志自滿，九族乃離。又曰：好問則裕，自用則小。以虺之賢，戒湯之聖，猶丁寧於此。舜稱禹，謂其不自滿假，益贊禹，願其以謙受益。孟子言舜，謂自耕稼陶漁，以至爲帝，無非取

於人者。聞一善言。見一善行。若決江河。沛然莫之能禦。與夫子之言好問好察。執兩用中。足相印証。以今人文字之工拙。較之聖賢心性工夫。參贊事業。何啻蚍蜉。而一知半解。翹然自以爲足。甚且護己之短。嫉人之長。聞良規而不信。寧滅身而無悟。明知不然而狠愎。固爲小人之過之文。實信其然而自熹。亦藩籬之鷄。烏足以知天地之大哉。

一主忠信

學問修行。總以忠信爲主。忠信。卽所謂有恆也。亡而爲有。虛而爲盈。約而爲泰。此近日讀書人大病。普願學者各存尙綱之心。外愈闇則中愈章。若外強則其中必乾矣。

一兼技藝

志道據德。依仁矣。子又曰。游於藝。禮樂之文。射御書數之法。今不盡古若。而登高作賦。大夫之材。對客揮毫。文人之樂。吾何執。執御乎。執射乎。見一技之不可忽也。柳公權云。非欲字好。卽此是學。昌黎旣病。夫俳優者之爲。而又曰。李杜文章在。光燄萬丈長。光燄卽不類於俳優矣。又願學者之兼所愛而精所擇也。

以上十二條。指示立品讀書作文之要。守謙崇實之方。而餘緒兼之。蓋不敢苟徇而不遵賢哲之高衢。亦罔敢大言而不中親切之實病。但能勉勉循循。則亦本末兼修。華實並茂之士矣。推類以盡其餘。又所藉於默識旁通之力也。

姚江課士錄序

姚江爲王文成先生故里。固理學名區也。自明迄本朝。斯文不墜。科第連綿。而百餘年來。漸次陵夷。何者。文不稽古。學無師承也。後生小子。將何述焉。余洩姚半載。乃取舊所謂北義學者名曰信成而一新之。改曰姚江。延構李君祖惠爲師。李君本姓沈。爲余分校浙閩所得士。其行之矜式。鄉邦文之衣被。大江南北者。二十餘年矣。在闈中。主司歎爲自來元家無此作。思藉其人。挽回一世風教。捷南宮第二。擬館選不得。咸惜之。需次家居。鄉之子弟。喜其歌鹿鳴而去而來之疾也。則考德問業。仍有恃。而天若有意以私於姚人。旣一歲。士之相從受業者。漸有得乎六經仁義之說。而相率爲堅古純粹之文。余公暇。一月兩課士。每課則兩廣文周君衡齊。桂君曹源必至。衡齊素善於李君。又偕司訓勤于其職。往往大聲疾呼。招來願學。未逮之士。而又爲之引繩批根。以堅其所信。微二君力。不于此。余于學問文章。有夙嗜。曾不意分校之役。爲姚之山長得人。遭遇兩廣文。又隱隱若啓若翼。宦海風塵。簿書鞅掌。如吾儕聚首。從容文事。一時之盛。可多得耶。時旣久。爲文日益多。擇其尤者數千首。先付劄劄氏。亦願邦之人士。率由茲詣。其亦不負山川之靈氣。而追蹤文成不難也。

季考示士子文

言以聲心。握管具形。本末文爲載道。操觚自見源流。故誦絃分春夏之功。矧竹箭肇東南之美。原夫姚之爲邑也。壤接明州。星連於越。芙蓉峰暖。湧黛色之千堆。蘭蕙江清。映靴紋之百疊。子林濼近。尙有高山流

水之音。神禹圖藏。遺餘臥虎。蟠龍之氣。燭溪湖畔。疑照星黎。石谷亭邊。如披金匱。女牆南北。一虹長臥。雙城翠岫。東西匹練。高飛千尺。若夫鏡臺樊榭。昔賢題咏。方多。他如舜井象田。古蹟存留不少。惟茲山川秀出。固宜文物踵生。蓋自伯施擅譽。宏通仲翔。秉操亮直。鹿亭鈔葯。菊圃奇書。代有名賢。何勝屈指。若此未遠。非必千有餘歲之前。如彼其多。總在百里提封。而近。惟文武之講學。爲濂洛關閩之復生。視象山之導源。尤事忠節。孝助名之丕著。瑞雲樓畔。尙有芳菲。陽明洞邊。如聞太息。月峯孫氏。旣墨妙盈庭。梨洲黃家。亦筆精充棟。填妙詞於葉氏。玉茗盡拜風流。揣雅態於諸公。琴操都含清曠。巍科高第。久甲寰區。烈士名臣。尤光竹冊。稱典型於在昔。果文獻之名邦。及風韻之未遙。蓋君子之五世。本縣巴地。菱才。川中。樗質。紅綾。啖罷。風簷。亦自身嘗。白版分來。案牘空嗟。形役。慕文翁之化。半載有餘。聽武城之歌。四郊奚似。前此棘園。校士。曾分永叔之公明。泊乎花縣。拈題。略識終童之英妙。茲當蒼精啓節。太簇聞辰。皎潔輕冰。對蟾光而寫鏡。飄飄餘雪。入簾影以成陰。正盃中椒滿之時。實花下筆酣之際。定於本月二十四日。齊傳通邑。生徒。並赴明倫堂。上面加考試。親叩淵源。蜀錦吳紈。定是光庭神麗。春華秋實。誰非奪目清新。斑管微濡。爭喜敲金而覆玉。雲檻小擁。同誇繡虎與雕籠。理守程朱八股。體聖賢語氣。制垂洪永終篇。流卷軸精華。維酌雅而稟經。陳言乃去。必芟繁而滌濫。文品以尊。至於對白抽黃。駢四偶六。雖屬文人餘緒。亦覘翰墨菁英。更有歌就三章。吟成五字。書生興致。壓元白於樽前。學士襟期。奏宮商於筆底。煌煌錦綉。累累珊瑚。但彈二日之苦心。敢負千秋之賞鑒。擇其尤雅。標列國門。拔茲蓮茹。送歸書院。臯比獨坐。延來舉國名師。絳

根宏開。接就姚江道脈。庶幾芳規復振。學社重興。以比年上苑花明。當聖朝廣闢四門之會。而轉眼蟪宮秋滿。又多士遙搏萬里之期。正宜淬厲青萍。應有司之尺度。亟合裁成黃絹。副識者之品題。其各勉旃。毋虛佇望。

城隍牒文

竊惟上帝好生。明神濟物。而司牧爲民父母。民實流亡焉。真此官姚邑負山濱海。廣數百里。居民數十萬。戶土壤瘠薄。所出稻穀。荳麥木棉之利。僅支半歲。餘皆仰給鄰鄉。雖豐猶殆。歉何以堪。查上年被旱。實在飢民三十萬口。流離轉徙。道殣相望。賴皇仁疊沛。加之二麥豐收。然元氣凋瘵已甚。補去年六月蒞任時。羸瘠初起。情形尙劇。屢經爲民請命。幸雨水和調。早晚二稻收成。俱及八分。民以無恐。皆神之賜。今夏始病。雨水過多。屆今早禾結實。晚稻秀發。正資嘉澍。而天道亢暘。經二十餘日不雨。旱魃將興。商羊弗舞。萬一鹹潮漸逼。車戽無施。厥憂豈小。謹約同城文武各員。設壇虔禱。自前月二十七日爲始。神其鑒念大災之後。十室九空。官逋私債。正需彌補。譬則大病初愈。更復摧殘。速之死也。司牧失職。上干天怒。其官甚惡。其民何罪。一載以來。其有隱情不得。撫字不周。喜怒刑賞不當。上負朝廷。下累百姓。神列誅殛。補身弗更。移毒及下。神其鑒補勤勞。閔其拙鈍。赦夙愆。如念精誠。尙可原宥。則祈立沛甘霖。惠茲子遺。補當省愆。思過倍益。冰兢。則與姚民共答神庥於無既矣。

樂只堂銘

余治姚之二年。時和人久寢以無事。乃得起衰興廢。改大堂而重新之。堂成。顏曰樂只。勒銘其上。用自省覽。以無忘父母斯民之職云爾。有美斯堂。政成教彰。求寧求莫。剪莠扶良。賈恥飾市。巫絕投漳。企彼前詰。循蹟相望。仰惟聖明。赫赫斯在。上天難期。下民恐殆。儼矣居高。敢忘子愛。作福作威。縱欲自肥。民瘼罔恤。怙過飾非。其或反是。材譴力微。柔懦不決。如脂如韋。凱以強教。弟以悅安。非強作悅。所慢爲殘。其惟賢牧。爲民錫福。民膏民脂。爾俸爾祿。職無曠官。恩均顧復。明月村龍。杏花春犢。芝秀披和。犀然剔伏。吏靡不畏。民罔不懷。龔黃卓魯。職有利哉。孰吉孰凶。何去何從。夙夜匪懈。以報九重。臣門如市。臣心如水。凜義不刊。詩云樂只。

六不齋說

余闢地治齋。旣成。顏曰六不。客問余曰。有說乎。對曰。有不貪。不虐。不違道干譽。不勤始怠終。吏胥不寬縱。案牘不停留。六者皆余所未逮。然竊有志焉。出而行之。入而思之。稍或訾焉。用自責也。客曰。如是信可以名矣。遂書之。

勸民歌序

姚邑山環水帶。土瘠民稠。貧困無以謀生。疾病不能自養。或老母而分爨。有生妻之去帷。兄弟深仇。因爭尺土。兒孫失教。久廢三冬。海邊之惡少行兇。老拳毒手。局裏之呼盧澈夜。舞榭歌樓。兩紙虛詞。吸盡愚民膏髓。一貧無行。穿來半夜。篋離資湖。蓄水無多。侵畊雜衆。趕奏徵糧。糧尙欠。詭寄零星。凡此行爲。均關

風俗苟小民之轍不改。皆長吏之教弗先。爰採邇言。用成歌曲。條列十件。以類觸目而悚神。人給一張。將使回心而向道。

李石亭文集卷三

族譜序

人本乎祖。祖一也。其後必分。分焉而至于什伯千萬。則傳世既遠。或有如秦越人之不相識者矣。又或有尊卑失序。以手繫足足加首者矣。夫不得不分者。勢也。分而仍不分者。情也。善乎老泉之言曰。吾所與相視如塗人者。其初兄弟也。兄弟。其初一人之身也。夫一人之身。而可漠然不相屬。且或戕賊之。而後甘心哉。吾族於明代居雲龍壩。頗稱繁盛。值張逆之變。吾祖美實公而外。無一存者。而祖又以幼齡失怙。隨母育於他所。族中事既不能知。而遭世之亂。家乘遺失。故世系由來。亦不可考。今自吾祖以下。僅四世耳。然吾懼夫後此之遠。而無所統而寢以淆亂也。於是乎作譜。雖然。譜豈徒以紀世系云爾哉。蓋將以尊祖敬宗而教孝勸弟也。故詳究歲時祠祭之私。并祠田行息之由。以著于篇。而先人有功德可紀者。則又各附小傳。庶乎傳信徵實。遠而不疎。近而不亂。宗法明而家政舉矣。若夫結強宗。棄手足。貪榮附勢。瀆厥派系。而不顧者。則吾所弗取也。

族譜圖序

李姓出於伯益。著於老聃。而蔓延于天下。其支分派別。有自來矣。第源遠而流益長。根深而枝益茂。雖積功累仁。崛起在位者。非不代有其人。而歷世既久。統系難稽。倘一涉附會。卽遺遙遙華胄之譏。况吾族之

家於羅者。明末遭變。幾無遺子。倘非美實公自脫于大難之餘。則羅之一支絕矣。其又焉能泝流窮源。遠追厥初。生民之際耶。故今之譜者。譜吾羅之一支也。雖然。羅之族繁矣。而美實又以幼齡失怙。育于繼父。莫能知族中事。迨承平後。欲考其實。而族人皆盡。舊譜散佚。所及知者。曾祖厚公耳。自厚公而上。名諱雖存。統系莫別。今欲定以世次。慮昭穆混淆。後先失序。以重子孫之罪。故第載其名于篇。倘兵亂時。吾族尙有逃亡在外者。俟他日相見。釐而定之。庶不失吾尊尊親親之意也。

附凡例二十二條

- 一、圖譜做宋廬陵眉山諸大家。定以五世前五世之末。卽後五世之始。今從美實公以下至朝字派爲一五世。從朝字派至義字派爲二五世。又從義字派至清字派爲三五世。百千萬世。咸以是爲準。但將來支流漸遠。宜各標房分於篇。以便觀覽。
- 一、昭穆用橫圖。書名書字書生。而子嗣直系其下。卽做古之宗法也。
- 一、配偶并書某氏。所以明一本之恩。示敵體之意也。元配曰娶。續絃曰繼娶。納妾曰再娶。據事直書。乃不滋人之疑。
- 一、士大夫必書字書號。次及爵位。俾不與衆同。卽貴貴賢賢之義也。令後人則而做之。庶可繼續書香。恢張先烈。
- 一、墓地必書某處某山向。令子孫知先塋所在。而祭掃可無失也。

一、立嗣無嗣特立者曰立。有嗣後立者曰育。收養遺孤者曰撫。並以先後爲序。直書立某之子。繼某之後。示生養兩重也。

一、山川古蹟居址墳塋。係合族公共者。則曰祖地。係各房另置者。則曰某某私業。開卷了然。庶無佔爭之患。

一、族中卓卓有功德可稱道者。生爲族姓光。死則據其事之本末。爲之立傳。載入譜中。以示子孫。其或行誼未優。間有一二端可採者。亦必於圖中註明。以示彰善之意。但須據事開載。不可稍有溢美。

一、族人稔惡不悛者。便須屏絕。不致有玷家聲。生不得列名於譜。死不許入祠堂。或譜中已有名者。宗長房長持公筆除之。

一、百行莫大於孝弟。父母在日。弟兄不得析居。有偏聽婦言。垂忤啓釁。意欲分產者。卽以不孝論。子婦皆逐出。父母五十以上不任勞。六十以後。雖寒素之家。必日備酒肉供養。不得與少壯同食。尤宜時時關心。愛敬備至。使一門之內。和順肅穆。上下同心。家道未有不盛者。

一、救患恤貧。在鄉黨且然。况宗族乎。凡族人遇難者。苟出於無辜。當盡力維持。其孤貧無依者。須念同宗一派。以時顧盼。不可令其流離失所。庶篤親親之義。

一、謙躬處世。不但免禍。且可以迓福。每見人家惡少。或倚父兄豪勢。或仗族人衆多。慣行不法。欺壓鄉鄰。不知天道惡盈。鬼神害盈。恃勢作威。立見消亡。此理之必然者。吾族子弟。須和好鄉隣。凡事退讓。富

而不溢。貴而不驕。乃得久長。若使氣逞能。傲物賈禍。吾不知其死所矣。

一、風水之說。近世士大夫多信之。昔滄叟對袁了凡云。但見戴紗帽者。尋地不見戴紗帽者。上墳此言足破千古之惑。夫陰地不如心地。在生窮兇極惡。死而欲以吉地庇其子孫。即使地果有靈。其如天理何。吾每見隨地安葬者。其子孫或至顯官。而仕宦之族。專意圖謀風水者。不轉眼而衰敗零落矣。此無他。心地之壞與不壞也。心地常培不壞。則修德行善之家。天必賜賢子孫。以爲門庭光。賢子孫又從而接續相培。則愈培愈厚。人文科甲。可永永勿替。不然者。稍一發達。便恃勢驕橫。則天必益其疾而速其敗。自是而兇惡之子孫出焉。雖欲不亡。不可得也。然則向之所乞靈於地師。以謂富貴可以常存者。不徒爲有識所笑乎。吾家世世子孫。但願培心地。不必擇陰地。遇父母大事。只求高阜平衍幽靜之處。葬之。朱子所云。他日不爲城郭道路者是也。至于子孫之發達與否。則天監在上。修之吉。悖之凶。何必問地。

一、居鄉黨中。與人排難解紛。亦是方便之門。但不可徇情倚勢。武斷鄉曲。又其甚者。自恃心胸狡獪。齒牙伶俐。唆人構怨。已反從中獲利。乘人之急。必多方措勒。見人之愚。必百般簸弄。只圖滿其慾壑。雖至親有所不顧。殊不知天道至公。賢愚一視。以人食人。得禍甚酷。凡棍徒擊騙人財物者。其子孫不爲乞丐。卽屬瘡痍。吾見亦多矣。爾輩切宜戒之。

一、士爲國民之首。子弟三日不讀書。便成俗物。况雲窗雪案。勵志鵬飛。家聲克振。端必由之。可或緩哉。

至于子弟朴者。竭方耕田。命其家業。勤紡績。時蓄養。亦治生之良圖也。外此如醫卜小道。即經商買賣。以有易無。未爲不可。但不可甘于卑賤。以取人譏。至隸卒跟官。尤宜痛絕。

一、祖墳公共之地。各房附葬者。須離舊墳二丈以外安穴。前不許牽。後不許騎。違者送官究治。仍行改葬。

一、三年之喪。通乎上下。正當寢苫枕塊之時。何忍爲宴會作樂之計。近世人不由禮。往往釋服從吉。又其甚者。會客演戲。則自鬧喪。居喪嫁娶。則自行權噫。是可忍也。孰不可忍也。吾族子弟。遇有父母大事。三年之中。惟閉門守制。凡一切慶賀酒筵。概不許與。己身及兒女嫁娶。概不許行。至期功總麻。亦必待服滿而後從吉。有不遵者。宗長送官究治。

一、人莫不幸于無子。無子而立後。當思祖宗一脈相傳之意。若以壻爲子。及撫他人之子爲子。則相傳之脈絕矣。異姓亂宗。斷不可也。吾族有乏嗣者。先儘胞姪。擇一人立爲後。如無可立。乃擇同堂之姪賢者立之。如亦無可立。乃立遠房。倘有以壻作子。及抱他人之子者。宗長率衆稟官。按律治罪。仍行改正。遺其子歸宗。

一、好訟非保家之道。即使公庭有理。亦必廢時失業。花散銀錢。所謂贏得貓兒賣了牛也。況一不勝。鞭笞隨之。身挂文網。鄉曲不齒。其辱何如。吾族中遇田土錢債。或與人偶有不明。憑親隣理解。可讓則讓。不必興訟。自取終凶之咎。

一、賭博最易惑人。其子迷溺其中。必至家產蕩盡。因而交結匪類。作奸犯科。名曰嚼嚼。遺臭千載。吾家永斷賭博根源。倘有犯者。以家法重處。不許少寬。

一、邪教律禁甚嚴。倘有身為端公道士。以及習爲符水之術者。宗長卽嚴切開導。令其改業。如執一不從。送官論罪。

一、男正乎外。女正乎內。閨門之禮。所宜嚴肅。孀居婦女。子已成立者。一切事務。令其子辦理。若子未成立者。宗長代爲處置。總不許婦人出頭。以玷清白。

一、諸惡以淫爲首。人之所以異於禽獸者。惟男女有別耳。若非偶相從。則與禽獸何異。試看眼前。佻達慣作風流事者。其後非貧困落魄。卽子嗣全無。大抵淫亂之人。念頭一差。不特身名俱裂。而冥責尤重。嗚呼。天道好還。無往不復。善惡之報。理有固然。可不慎哉。

右二十二條。俱關持身立品之大要。其餘當法當戒。言不能盡者。皆可依此類推。若敢視爲陳言。藐不遵守。家法具在。不能爲爾輩少寬也。

文昌孝經序

儒者爭言孝。而不言禍福。此襲宋人之言。而不達於聖人之旨者也。舜之孝。以德爲聖人。而尊富饗保。德爲福基。孝爲德本。孰錫之。天錫之也。如是錫之福。不如是降之禍。其必然也。故曰。栽者培之。傾者覆之。聖人之言。明白可見也。天地之大德曰生。孰生之。親生之也。父者。一家之天地。而天地者。萬物之父母。天地

合而背親逆天之倖道於父母者必無所逃於天地故在天之賞罰不僭而人之感應隨之是孝者百行之準則也且夫盡孝者豈必其言之云爾哉然終日提撕曉告雖愚夫亦知警覺况通人乎故致知爲誠意大關而可使由不使知聖言尤當善會此文昌孝經之所以與聖言合也余成進士需次家居有怔忡疾因誦是經油然而感焉焚香盥手日夕禮誦經久而疾瘳因矢願重梓廣播逡巡未獲茲捐俸餘乃克爲之昔瓊山尊信是經入場有奎斗之應前哲之不我欺未知何如願宿疾之愈有明徵矣而使風行四境借禍福之說以培養其本根而激發其孺慕大易所謂利用出入民咸用之者豈不以此也歟

陸載一先生六十壽序

古稱不朽有三而德爲最士生當世不必盡擁大蓋策駟馬意氣揚揚也蓋其人具天地秉彝之德鍾醇厚之氣而又游之乎詩書之源行之乎仁義之途貌則甚古而神則甚暇以立身則端而且惠以接物則老而益恭以處當世之士則恬退而不競由是士林傳之閭里頌之翕然有仁人君子之目所謂太上立德微斯人其誰歸陸載一先生吾鄉立德者也自始祖金陽公三傳而至先生累世以來率皆陰行其德不求人知故譽宮偉望常爲吾邑冠其積之者厚也先生數歲而孤其尊大人君虜先生遺書一篋以囑程太夫人曰吾讀書入泮承先人緒業兢兢惟恐失墜不幸中道棄捐後當以此書教吾兒使無忘先人之志太夫人受而藏之比先生年稍長卽知讀書發篋中所有觀之過目輒不忘而太夫人茹荼集蓼之餘又嘗一燈課讀和丸助勤朝夕勉以成人之道故先生學是三餘才儲八斗甫弱冠卽補弟子員嘗是

時鄉黨咸器之。以爲士龍復生。嘗不過是。而先生乃絕意仕進。不獻三都之賦。長念五柳之風。居常謂人曰。吾有田可耕。有子可教。詩書足以自娛。糟邱足以自遣。吾何求哉。於是開三徑。蒔松菊。放懷古今上下之間。求忠臣孝子之遺事。端人烈士之高風。以筆之於書。而時見之行事。興至則滿飲一大卮。如子美讀漢書故事。陶然洒然。不知老之將至也。先生有二子。長孝先。次慎先。幼卽嶄然見頭角。甫成童。皆入彙序。論者謂其家學淵源。大匠之門。無鈍器。故人所難者。亦取之如寄。此非先生之貽謀者善。何以得此哉。其在詩曰。溫溫恭人。惟德之偶。又曰。有覺德行。四國順之。先生有焉。是以知先生之福之未艾也。先生自爲諸生者垂四十年。至于今。學益富。文益古。而其年益高。都人士以爲先生奕葉行善。累世書香。今杖於鄉矣。不可不爲先生壽。又以知先生者莫如余。命爲文以序其事。余惟先生之德。不朽者也。先生之壽。本乎德者也。德吾所謂德。自能受天之眷。迓無疆之休。以長爲一邑典型也。又何俟今日繪函谷之圖而後知修齡之有徵哉。

李石亭文集卷四

明倫堂碑記

事之忘其實而僅附其名者。廢之可也。而事之著其名而並存其實者。廢之不可也。若明倫堂之建。非所謂著其名而並存其實。而有其舉之莫敢或廢者哉。粵稽三代造士之法。至詳且備。而其設教之地。於國則曰學。於鄉則曰校。庠。序。而又有小胥。大胥。小樂正。大樂正。司徒。司馬之官。以因時而簡教之。以故士之沐浴詠歌者。皆曉然於人綱人紀之重。而飭典惇倫。期無負選造之至意。孟子曰。六倫明於上。小民親於下。不信然哉。此明倫堂之所自昉也。國家建立學校。董以師儒。其造士之法。直可比隆三代。而又屢頒聖訓。諄諄以孝弟爲先。無非欲多士之爭自濯磨。以共勉於人倫中也。第羅邑係新分之縣。學宮雖建。而明倫一堂實闕。不惟司訓者無以進多士而講業。而士之入黌序者。亦無由顧名而思義。曩雖有鼎新之志。而寢以不果。蓋築室道謀者十餘稔矣。幸乙丑仲夏。旌陽闕明府來治吾羅。下車之始。目擊學宮曠缺。慨然議新之。首捐二十金爲士夫倡。而司鐸韓君亦量解清囊。身率諸生繼其後。兩閱月而堂成。伐石囑余記其始末。余惟思堂之廢。不知幾何年。今一念經營而成也。忽焉非留心學校。雅意作人。以振興斯文爲已任者。烏能有此。繼自今羅人執經問難。博習親師。不患無地。而登斯堂者。目擊道存。亦將默動其慈孝友恭之念。而不容自己。韓子云。行之乎仁義之途。游之乎詩書之源。無迷其途。無絕其源。於是乎在矣。然

則斯堂之建豈徒以其名哉。

文昌宮碑記

文昌之宿在奎壁之次。主文柄而帝君之尊配武曲。厥祀遍天下。於吾蜀尤謹。蓋靈異之跡。明而爲人。幽而爲神。切近昭著。俱可徵信者。莫慈土若也。羅江距梓潼不過二百里。以實沈主參。臺駘主汾之義例之。則山川星辰。民所瞻仰。於是焉在。又非止文字之行世。若水之行地。無往不在。宜人人不忘其所宗主而已也。羅江縣治之北三十里。曰河村。有山名月峯。上起文昌宮。而余之家在南村。與河村隔一水。當二月三日。帝君降誕。則兩村之人及附近各村並走焉。相與焚香祝獻。優伶歌舞以爲樂。辛未之春。南村人於其本村得所龍神堂者。中有聖像一尊。第渺小。乃思斥其堂而新之。改故像而大之。旁爲天龕。爲地啞。余時需次家居。實贊其謀。其夏。卽上京謁選。龍神廟者。取其址而已。鳩工伐木。棟楹梁楹。皆更爲之。墻垣門戶。極堅好。四壁圖書。煥發精采。又雕刻神龕一座。神像裝設。俱如創始。所謀者前後共費八十餘金。皆出衆力所襄贊。自是凡遇會。遂不必更至河村。而南村遂爲一勝地。余推文昌尊神。一方文運所係。不厭家祀戶祝。又况吾鄉之人。第願鄉之人。嫻于帝君孝友之訓。以事其父兄。以教其子弟。歲時祠祀。進退雍容。都雅無長其器凌好勝之習。以漸遠于敦龐。而又嚴爲規制。求所以有始終者。是則可書也已。

重修觀音寺碑記

烈士殉名。貪夫殉財。名可殉而財不可殉也。近世殉名者寡。殉財者衆。此在人情類然。而緇流爲特甚。夫

釋氏見性明心。能空一切色相。諸有萬緣。纖毫不染。若區區利鎖名羶。不能擺脫。又何解脫之足云。故予嘗論釋氏子能參禪悟道。吐棄一切者。上也。其次則不貪財利。不惜勞苦。補修寺院。期于有成。若逐逐於腥膻之場。與庸夫俗子爭多較寡。風斯下矣。觀音寺僧如永。本平池僧教洪法嗣。因此地屢易住持。禪宇廢壞。墻垣坍塌。左右檀越。目擊不忍。爰商同衆姓。延請如永。與其徒常開居住。永自到寺至今。中間不過十年。而西廊之朽欄者重新。東廊及前殿之圯者改換。山門三間。昔無而今有。禪房一所。去舊以圖新。買水田三十二畝。添供香火。築墻過圍。塑靈官於門樓。栽竹柏於隙地。今又改造正殿。另塑大佛三尊。凡此不世之功。均如永師徒自爲捐資建造。並未叩及十方。夫此非所爲不貪財利。不惜勞苦者歟。此寺至兵火後。妙空禪師。叛於康熙初年。其後三傳而絕。安縣僧如善繼居之。募建西廊。不再傳而亦絕。所建廊房亦隨圯。嗣後住持來去。訖無寧居。視寺宇如傳舍。漠然不以關心。苟非如永師徒相繼鼎新。則妙空禪師所建造。幾何不復化爲灰燼耶。吾聞有不世之功者。必享非常之報。今如永之建。豈若此。法孫自此其興乎。抑亦可以愧僧之貪利而不廢。垂死訖無一成者也。爰壽諸石。以示其後。使後之人皆有感而興焉。

同善橋碑記

善可同也。不可獨也。蓋獨則私。同則公。獨則難爲。同則易舉。凡爲善者皆然也。而橋爲尤著。吾鄉素號醇謹。父老子弟。敦朴有古風。數年來。于路之崎嶇者。靡不治。橋之傾圯者。靡不脩。獨此地需橋孔亟。而闕焉不舉。非人心不同。亦事必以漸也。甲子冬。吾鄉人一念經營。衆志成孚。諏吉鳩工。閱兩月而告竣。予惟世

之有財者衆矣。然往往慳囊難破。卽或間有施舍。亦多惑於浮屠。又或共爲一事。二三其見。築室道謀。不能度德比義。以相勉於善。孰若吾鄉之除道成梁。不吝已貲。而衆人一心者乎。雖然。橋者善之一端也。由是而推廣之。以幾於風清俗美。型仁講讓。不獨父其父子。其子而後。謂之大同。吾鄉之人。其不以此自足。而共勗于道。以永守此同善之風也。是則吾之所禱也夫。

月波橋碑記

羅江北四十里。地名南村。與安縣接界。有水焉。源出蔣公堰。由象鼻山過寶林寺龍神堂以下。達於劉家河。蓋里人之所資以灌田也。水之支流。汶港甚多。而居其中。可以作堰宣洩者。則曰大溝。溝闊不可踰。而瀦水之處。又甚深。非蹇裳可濟。舊有二橋焉。一在張家堰下。一在龍神堂前。年久不治。日就坍塌。往來行人。往往傾跌。是懼。里人憂之。謀所以新之者。而又苦獨力之難成也。于是叩四方善士。共解囊橐。以襄盛舉。鳩工伐石。始自戊寅冬杪。迄今年夏五。而二橋成。橋之左右。凡係小水之處。如所謂支流汶港者。俱架石焉。蓋舉其大。不遺其細。吾鄉人樂善之心。於此可以暢然無憾。而四方之往者來者。步者輿者。亦自茲永無病涉之苦也。詩曰。履道坦坦。不信然歟。龍神堂前。舊名飛龍。今仍之。橋之在張家堰下者。初未有名。今題曰月波。蓋水勢蜿蜒如龍。其環抱之處。形如半月。故曰月波云。

餘慶橋碑記

善不足以濟。則非善。願以一人濟衆人。其勞將立窮。而以衆人濟衆人。其事恆易舉。古者杠梁之設。督之

在官歲一新之。以便斯民。然而窮鄉僻壤。山巔水涯。非能一一而杠之梁之也。故以民勸民。而梁之成也。忽焉。凡以靳有濟而已。象鼻嘴者。綿安接壤也。北走神泉。南通紋水。往來行人。絡繹不絕。中有一澗。雖非巨流。而自夏徂秋。河水泛溢。招舟子而無從。欲蹇裳而莫濟。隔岸相呼。不無咫尺天涯之恨。甲子歲。吾鄉人侯等。一念經營。首倡盛舉。募衆捐貲。架以石橋。是役也。約費百金。匝一年。自今告成以後。履道坦坦。乘輿者有按轡徐行之樂。徒步者無淺深厲揭之難。濟之衆矣。善莫大焉。易曰。積善之家。必有餘慶。吾知諸君子之好善。必有以獲其祥矣。故以餘慶名橋。而爲之記。

昭通橋碑記

潯江發源安縣。迤邐而下。至羅江縣北關外。與瀾水合。東流入中江界。記水之始達。不過僅可濫觴。漸納溪流。而其勢益大。由白塔寺興隆場口。底于野壩堰。汪洋恣肆。澎湃奔騰。殆巨川不是過焉。堰之下。有渡口。爲安縣羅江彰明接壤。地則犬牙相錯。人則烟火萬家。加以商賈絡繹。往來輻輳。每當夏秋。江水泛溢。洪波巨浪。非一葦可杭。行者苦之。僉欲以輿梁濟。議不果。歲戊寅。時和人父。里黨之間。咸鼓舞從善。于是共謀醵金。以成橋。橋工始自上年秋。閱一載而竣。狀如長虹臥波。青龍見水。往者來者。步者輿者。莫不利涉。蓋前此所有志焉而未逮者也。夫事難成而易敗。時難得而易失。曩予宰姚江。有後濟者。功將垂成而廢棄不舉。余爲之設法。竣其事。至今以爲美談。茲地界三縣之交。人各一心。不相聯屬。橋之成也。蓋難矣。乃一念經營而應之如响。則豈非年穀豐熟。人心好善。故能易其所難。而成功之甚速耶。大同之世。有分

士無分民。一人之心。可通乎千萬人。一端之善。可通乎千萬善。由茲橋以觀。知吾鄉人之衆志克孚。而不以畛域異也。將所謂同德比義而相友相助者。豈有涯哉。爰題曰昭通。而爲之記。

重修月峯梓潼宮碑記

馮家嘴有山曰月峯。在羅江縣北三十里。雙巒特出。峭壁磷砢。攝衣而上。登其巔。則河村南村之烟戶。歷歷可數焉。蓋一邑文風之所蒼萃也。上有文昌宮。爲士子瞻拜之所。創造不知何時。明末兵亂。委於灰燼。有志者議修不果。康熙壬午。庠生范廷涓刈草爲庵。讀書其中。慨然念聖靈之未妥。文教之未光。乃與明經陳君獻三。招募衆士。裝嚴聖像。兼修樂樓一座。迄于茲數十年矣。風雨漂搖。木朽蟲生。加以乞兒盤踞于中。日散夜聚。或折毀牆壁。或污穢殿宇。以致此廟依然荒涼。陳君目擊心恻。不忍坐觀其敗。爰倡首刻日鳩工重修。去其朽腐。易以良材。又于正殿旁接修偏房二所。前修拜亭三楹。亭下砌石爲臺。中置一門。懸于崖畔。一時啓閉。擇醇良者鑰之。遂煥然爲兩村之觀。是役也。始自庚午冬。越辛未夏。不一年而成。其間募衆固多。而陳氏之父子祖孫。宣力爲尤多。帝君之靈。從茲其永安矣。而今而後。將使兩村之人。以時瞻拜。入門生敬。追惟孝友之訓。益深報本之思。當必有魁梧傑出之人。以爲文教先。是又此山之靈秀所鍾。而亦卽帝君之仁澤所覆育於無已也。

書院田房記

世之學者。莫不由教入。顧教之於塾。家自爲學。人自爲師。文章不能趨於一軌。其風遂不能以大振。司民

牧者知其然。爰倣古人黨庠州序之遺意。合一邑士民而納之書院。地必爽塏。居必宏暢。延名宿爲師。厚其修脯。以示優崇。而諸生膏火。亦以時均給。寓激勸于樂育之中。典纂重哉。羅江雖蕞爾邑。有明三百年來。名賢輩出。厥後罹流寇之禍。民若晨星。文獻俱亡。吾羅遂以委頓。幸奉聖朝。撫綏招徠。休養生息。百餘年間。元氣漸復。然而書院之設。前此未嘗議及也。滇南楊公。來治茲邑。爲政精敏而仁恕。決獄訟。不事敲朴。務得其情。甫踰年。境內乂安。於是課士之餘。銳意建修書院。以廣教澤。召諸生而與之謀。僉曰。唯唯。時余適以憂歸里。公命偕諸君董其事。余以羅故有奎星閣在城南。今書院旣設。閣宜並舉。匪但培補風水之云。亦取朱衣文明之兆。公曰。然。是我之夙心也。議旣定。一切相度地形。規畫可否。公爲之主。余與二三友人贊勸其後。甫期年。大工告竣。郡人士及鄰境之秀者。喁喁向風焉。公之功偉矣。抑不知吾羅之所以感公戴公。沐膏澤而咏勤苦者。宜何如之。咨嗟太息而不忍置也。奎閣計三層。上塑奎星及文昌像。書院凡四進。大門三間。二門一間。過廳三間。講堂五間。耳房八間。廚房四間。亭子一座。池一口。用示壯觀。至書院田畝。舊在東村廣興寺者。計田七十五畝。八分九釐一毫。地四十五畝。五分一釐一毫。每年收租穀市斗五十七石。近從吳家菴撥入者。計田二十五畝。二分二釐五毫。每年收租穀市斗一十六石。略村河灘地一十九畝。零八釐九毫。每年收租銀六兩。北關外新墾田一畝八分。每年收租穀市斗一石六斗。公重其事。以屬縣尉張君。履勘丈量。繪形立界。另立紋江書院册名。歲輸糧銀二兩九錢一分零四毫。佃戶代納街房門面九間。縣署前七間。歲收租銀四十六兩二錢。書院大門旁二間。歲收租銀九兩二錢。外有各

寺院捐銀二百兩。交與值年會首生息。以濟膏火。用垂永久。是役也。前署縣尉張君朝。職沈君文玉。及署儒學訓導王君名佐。皆與有勞。例得備書云。

按書院卽滇南楊公周冕所創之紋江書院也。自安縣來曰瀟水。自綿竹來曰澗水。俱至羅江城北澗亭會。總名羅江。言水如羅紋。縣所由名也。故又名雙江。紋江則楊公初名也。田房記爲先君撰。故仍原名。此記久佚。今得原任訓導杜姻親耐菴示。因補之。調元識。

旌表節孝何母王太宜人節壽橋碑記

州西三十里。有山曰台。孤巒特起。勢插雲霄。由茲山迤邐而東。地稍平衍。前臨大江。有茂林修竹之勝。而何氏實世居其間。墳墓在焉。攷何氏世爲綿州人。簪纓閥閱。勝於前代。及明之衰。而族姓零落。有生員何公披雲者。善岐黃術。遠近求之。無弗應。生子坤。早沒。遺媳王氏。青年守志。白首完貞。蓋卽今之奉旨旌表而例贈孺人者也。孺人事翁姑至孝。治家甚勤。當茹荼集蓼之時。以父道兼子。以母道兼師。卒能興起門庭。克昌後裔。長君漣。以優貢出仕滇南。仲君涵。亦以增庠生升入成均。至于孫枝秀發。玉樹敷榮。若人麒麟麟輩。或待詔金門。或食餼饗序。彬彬稱一門之盛。人謂天之報孺人甚厚。而孺人不以自多也。老而彌健。貴而能勤。含飴弄孫之暇。輒身率臧獲婢僕。手自紡績。至夜分不倦。歲旣久。探囊中計紡績所入。共得七十金。孺人願謂仲君曰。吾家世業。活人甚多。以此發祥。故吾生平不喜奉佛吃齋。惟喜濟人。然往往有懷莫遂。今吾且老。甘旨不缺。汝等亦皆豐於衣食。念此金係吾所積。每思所有以善用之。吾聞利濟莫

如橋。今各處小橋。吾已陸續捐貲。成梁濟涉。惟何家營大溝。雖非通衢。而往來不絕。汝其爲吾建是橋。以成吾志。仲君曰唯唯。於是鳩工伐石。不數月而告竣。孺人顧之色喜。又以余與長君仲君世好莫逆。其於孺人猶子也。囑一言以爲記。余惟孺人之節。早已上達紫宸。傳聞人口。更何待言。惟是孺人壽逾八袞。春秋高矣。而猶惓惓於爲善。其亦不僅壽一身。直欲壽諸千萬世也。因節以獲壽。而壽亦愈以顯節。斯橋之成。非名之以節壽。其將何名。

祠堂說

古者立祠堂爲四龕。以奉四代神主。高祖、曾祖、祖父也。始祖之祭。始自程子。雖朱子有似禘之疑。然世遠而派別。不有始祖一祭。無以收族。是亦禮以義起之一端也。况所謂始祖者。以遷居此地。及初有封爵者爲之。非必厥初生民之祖也。隨分致祭。何僭之有。吾家上世不可知。論遷居此地。及初有封爵者。則當以美實公爲始祖。而厚公不與焉。禮曰。別子爲祖。繼別爲宗。繼禰者爲小宗。有百世不遷之宗。有五世則遷之宗。美實公則吾先世之別子也。是爲始祖。而美實公之長子。世世以長繼別。是爲大宗。美實公之衆子。則各以其長繼己。是爲小宗。始祖百世不祧。小宗親盡則祧。此古之宗法也。故古者子孫繁衍。廟制非一。有禰之廟。自己之兄弟子姓成屬焉。有祖之廟。自父之兄弟子姓成屬焉。有曾祖之廟。自祖之兄弟子姓成屬焉。有高祖之廟。自曾祖以下之兄弟子姓成屬焉。有始祖之廟。則一姓之兄弟子姓成屬焉。其爲典也備。而其爲制也詳。後世人不師古。親親道微。生者侈輪奐之觀。死者無一瓦之覆。匆匆送葬。三載除

服以爲人子之事於是焉畢。歲時不告，飲食不獻，生辰忌日，置若罔聞，則求其有祠堂不可得，又何論乎百世五世之縷別也。夫主必有祧者，一定之制，而追慕不忘者，報本之心。近世大夫家建立祠堂，自始祖以下，木主皆設廟中，雖親盡而不祧，此其制非古，而要惟不忍忘其親之意。吾家祠堂卽用其法，正祠三間，長房居中，其高出者爲始祖，二房居左，三房居右，各設一龕，每一代爲一階，層遞而下，所謂彌廟、祖廟，均於是焉在。大宗、小宗，卽於是焉分。庶幾遠有所統，近有所宗，名分得而支派別，子子孫孫皆得以展其孝思矣。祠建扁擔灣，係徐國王之業，今三房用價買其田地山林，而以基址一所并附近田一畝，捐作祠基，約同族人起造正祠十一柱三間，耳房七柱東西各三間，拜廳五柱三間，大門五柱三間，廚房五柱三間，共十八間，祠成，改扁擔灣爲祠堂灣云。

墳墓說

墳墓係祖宗宅兆，子孫命脉，不可不加意護守。先人家於雲龍壩，故墓皆在焉。由雲龍而上，曰象山，山之北，地名扁擔灣，今改祠堂灣，有祖墳五十一塚。歷年附葬新塋三塚，山之南，地名長溝，有祖塋一十九塚。歷年附葬新塋七塚，其象山而下，其逼近雲龍寺者，則曰雲龍寺，祖塋共計二十九塚，其由雲龍寺迤邐而下者，則曰雲龍壩，祖塋共計四十八塚，地各有界，歷世護守，祭掃進葬，不許他人砍伐樹木，不許異姓越界佔爭，不惑於各房風水之說，而騎龍截葬，不輕聽地師邪妄之語，而擅遷故塋，有一於此，宗長房長率衆稟官重治。

祭田說

古者祭必有田。蓋犧牲粢盛之所由出也。昔范文公貴時。置義田千畝。以濟羣族之人。而祭祀之費不與焉。大抵先有祭田。以祀祖。而後置義田。以活族。吾以爲祭田之中。即可該義田之制。道在多多益善而已。吾族家廟新建。未有祭田。祭祀之費。向係闔族公捐。然此可暫而不可久。今於劉家河買田十九畝。又桑家庵原存祭田一畝。共置祭田二十畝。計每歲所入。可得二十金。清明冬至。約用銀十四兩。美實公及李孺人生辰忌日。每次用銀一兩。共銀四兩。年節祭祠。用銀二兩。俟後再有續置。則於祭田加豐。以其贏餘濟族人之孤貧者。是祭田也。而義田寓乎其中矣。蓋將來置業零星。若不登記明白。恐爲不肖者占據。故另列祭田一篇。凡有置買。卽依數開載若干畝。并坐落四至。庶乎久而不忘。多而不亂。而開卷卽得瞭然也。

祭祀要略說

人必有祖。祖必有祠。祠必有祭。所以盡報本反始之心。尊祖敬宗之意也。近人往往厚於自奉。而忽于祖先。夫鬼神血食。祖宗之賴有子孫。豈第生養死葬而已乎。今酌定每歲冬至祭始祖。清明祭墓。夏至祭禰。則各房自祭其私親。祭之公者。費出於公田。主祭以宗子。至各房私祭。或另置祭田。或本房公捐。總不得於始祖祭田內支用。至於出入必告。有事必告。朔望則參。俗節則參。忌日生辰。追祭不忘。此皆事死如事生之道也。每逢致祭。必闔族齋戒。不得視爲泛常。祭畢。以其餘燕飲。宗長訓族人以孝弟忠信立身行己。

之道。歲率以爲常。

冬至祭始祖文

人本乎祖。澤厚流長。貽厥燕翼。而熾而昌。先疇未遠。舊德難忘。屆茲長至。方肇一陽。反始報本。有飴其香。靈其降格。佑我無疆。

清明祭墓文

綿綿祖澤。鬱鬱佳城。神於是宅。保我後生。夜臺永安。松柏常榮。屆茲寒食。澆酒陳牲。少長咸集。奠獻惟誠。子子孫孫。護守斯塋。

夏至祭禰文

人道所重。首在親親。秋霜春露。日月如新。非父非母。焉有此身。誰非爲子。不念先人。感時備物。克祀克禋。庶幾佑我。景福駢臻。

名派歌并序

名之有派。所以別世系。聯疎遠。防重複。親親之意也。故世遠則疎。名多則亂。自古而然。於今爲甚。誠酌定世派。昭穆以次相及。雖異日瓜瓞連綿。居不一地。統系分明。亦斷無尊卑失序之憂。且令子若孫各以其世比而同之。無生彼我之嫌。咸敦一本之義。其爲益豈不大哉。爲擬二十字於左。一字爲一世。俟週續擬李氏名派歌。

朝端崇道義。

庭際尙清芳。

孝友家聲遠。

祖宗功德長。

李石亭文集卷五

陸金陽傳

陸金陽，羅江人。世居金山。生以勇力聞。其時明季兵亂，金陽約鄉人分爲四屯。屯各置長，長樹一大旗，轄卒五十衆，推爲屯長，守潼川要衝。人皆德之，呼爲陸大旗。張獻忠之戮蜀也，人民奔竄，金陽兄弟五人各守一屯。屯未分，賊已逼近。金陽謂諸兄曰：「苟去，賊必尾擊，不能全矣。不如守以待戰。賊苟退，則無虞也。及賊衆至，金陽力拒之，而諸兄皆委幼子進先奔。金陽無如何，因負進且戰且走，求諸兄家小幼，皆不知所之。而賊勢四張，不得已，奔匿縣之須雲山，採樵而食，居十餘年。賊氛熄，乃出歸故處，盡蕪無居人。公顧進而涕，將求其兄，進嗚咽止之曰：「伯父等不在耶？求之不能也。苟在耶？將自歸也。且失者求之人，未可必得。恐父子又相失也。」公然之，以故居之蕪也。因去之河村壩居之。今蒲家營是也。國初，吳三桂兵敗，將卒四出劫掠，居民以公勇力，率鄉人相拒。賊聞大旗名，解去。公名益著，互相謂曰：「苟遇盜，速呼陸大旗，盜必退。如被虜，呼之，盜亦必退也。」有盜聚處者，名曰土豹子，掠鄉人，獲則殺食之。鄉中被獲者，輒呼公號，免者數十人。鄉有遇盜，割一乳者，公知之往救，盜見卽釋之。其人走回哭謝，公曰：「胡不早呼我而致傷乎？」曰：「惟呼公止食一乳耳，不然不免。」承平後，乃遷南村家焉。公形貌魁梧，秉性剛直，與人相處，輒裁冠正色，無論識與不識，望其冠，皆曰：「陸大旗來也。」

劉三策傳

劉三策字坤山。羅江縣人。父正槐。兄弟三。長三謙。季三位。次卽三策。謙位俱無嗣。三策生於流寇張獻忠作亂時。偕其妻鄭氏同逃。中道相失。遇賊於荒山。賊欲及之。給曰。吾能歌。請歌一闋。以免死。可乎。賊命之歌。歌罷。賊悅。賊不欲以全人釋也。斫其右手而遣之。明日。遇鄭氏於水岸。遂引去。至石泉。匿跡深山中。採樹皮草子爲餅充饑。當是時。加以野居露宿。濕氣交攻。艱難萬狀。幾不聊生。然卒以身免。居數年。生子先德。值蜀中平定。乃謀歸。未至。住安縣桑棗園。又四年。移羅江河村壩。自脫難後。右肢雖廢。而力作如故。開荒闢草。胼胝經營。經歲無虛日。性疏爽。凡百家技巧。不學而能。與人相處。溫溫如也。然不畏強禦。遇人有不平事。輒以身殉。故戚鄰咸其意氣。咸帖然稱之。嘗聞先德之言曰。吾昔爲賊所獲。自謂必死。賴祖考靈。以免其身。吾家世清白。耕讀爲本。爾子孫宜力追先志。無墜家聲。吾行將復祖居矣。未幾沒。子移南村家焉。以萬曆辛亥年生。至康熙壬子年卒。壽六十二。妻鄭氏。與三策避兵。中道相失。時因路險行急。墮水中。未出。而賊兵繼至。自度不免。乃以面浮水。佯爲泅死。飄沒之狀。賊至。曰。死人也。以矛刺其背而去。後至者。又刺之。鄭氏忍痛氣絕。卒不出聲。賊去。復甦。嫡侄鄭某見之。負之而出。避空宅中。明日。與三策會。相向而哭。蓋三策斫手之日。卽鄭氏刺背之時也。誕一女。甫弱。彌日而罹。身抱女在水中。卒無恙。蓋天之不絕劉氏也。後生先仁先義。以天啓壬戌年生。至康熙乙亥年卒。壽七十四。

附美實公傳一

才華公傳二

鴻飛公傳三

英華公傳四

美實公傳

公諱攀旺，字美實，前羅江縣雲龍壩人也。生三歲而孤，母王氏再適同邑李雲卿，公隨母育於李。值流寇張獻忠亂，人多逃亡，時李富於財，既死，其僕何駒者謂公曰：子非李氏嫡而受其財，族衆忿甚，不去將殺汝。公于是歸。時年二十三矣。至則宗族盡散，無一存者。公子身無倚，隨鄉里二三人走石泉。是時賊衆猖獗，所過殺傷，焚掠殆盡，民食無所出，強者殺人而食，弱者幸以身免，則匿跡深山，採樹皮草子爲餅充饑。公嘗絕食三日夜，于空宅中獲一貓，燒食之，得不死。張養心者，宋有聯之妻弟也，公與有聯同被兵，故識養心。一日至其處，養心召公同食，時無碗，以瓦片盛肉而已。公稍嘗知其味異，然不敢明言，乘其不見而棄之。歸以語有聯曰：若輩素食人肉者，奈何食其食乎？於是心影成疾，腹膨久不愈。聞渡夫王五善針灸，就而灸之。他日又至其家，王五夫妻方食魚，將盡，止餘頭尾。見公至，則以食公，而謂之曰：好好有頭有尾，子之疾至此除矣。由是果愈。公在石泉二年，值蜀中平定，乃歸住河村壩。時土曠多年，田地荊棘中，公開荒刈草，獨力經營，又歷十餘年，粗有積蓄，始娶妻，卽吾祖母李氏也。時年四十一矣。厥後移居毛家壩，又十餘年，移南村壩，子孫今家焉。當時兵燹之後，鄉人存者百僅一二，而公族屬又無一人在者。故前後三遷，皆就伴居住，未得復業。公爲人忠信渾樸，不較是非，凡事退讓。人有犯者，輒溫語謝之。嘗謂人曰：吾昔在兵劫中，踰越險阻，衝冒鋒刃，野居露處，朝不保暮，自分必死。今幸上天之眷，祖宗之靈，以有其身，得延李氏之一綫，吾何求哉？吾唯有吃得虧三字，可以保身，可以遺後，願世世子孫守而勿失。至于機巧

變詐。是吾所短。然亦羞而弗爲也。鄉里以此多之。至今稱爲長厚。治家以勤。當役差徭繁重時。怠惰者多失業。而公未嘗缺乏。遇戚黨有恩。貧者多所周濟。以明天啓丁卯年生。至國朝康熙庚辰年卒。享壽七十四歲。以孫化楠貴。乾隆十九年。賜贈美實公爲文林郎。餘姚縣知縣。祖母李氏。賜贈孺人。子三文彪。士達。文彩。

才華公傳

公諱文彪。字才華。美實公長子。自幼隨父開荒闢草。創業成家。年甫三十。美實公卽見背。下有二弟。均在弱齡。時人烟稀少。田地半屬荒蕪。豺虎之跡。滿于道路。羅邑路當首衝。差使絡繹。供應浩煩。稍不奮勉。卽無以自保。公殫力經營。門戶之役。以身獨任。令二弟從師讀書。閱數載。鴻飛公入武庠。又數年。兄弟始分析田地山林。三分均分。論開創守成。公之勞績實茂。而終不以此求多多者。蓋公之寬厚而仁恕也。公壯貌修偉。多鬚。遇事寬緩。與人言恂恂如不及。雖久與遊者。未嘗見其有疾言遽色。力田自給。不貪榮利。延師課子。務盡忠誠。晚年喜釋氏經典。朔望盥沐。莊誦教兒孫。以安分循理。勸鄉隣。以務本力農。崇儉約。敦退讓。雍雍有君子風。人以美實公之家法。未墜云。公生于康熙庚戌年十月初五日。至乾隆辛未年卒。享壽八十二歲。子六人。一過房。一爲僧。存者化梓。化椅。化梅。化桐。

鴻飛公傳

公諱士達。字鴻飛。美實公次子。幼讀書。能屬文。試輒不售。因棄而就武。然非其所好也。性嗜飲。雖多不亂。

與人交。必盡其歡。朋輩相狎者。每一見。必留連款洽。忘爾汝形。居心耿直。于人無所迴護。人皆憚之。然於氣誼相投者。亦每霽顏溫色以相待。人是以畏公之明。而亦未嘗不樂公之寬也。公娶元配趙氏。年幾四十。未有子息。兄弟皆以爲憂。公慨然曰。吾生平行事。未嘗得罪于人。得罪于天。天豈真絕吾嗣哉。吾惟修身行善。以俟命而已。自是益加勉勵。周濟貧乏。修治橋梁。裝飾佛像。補葺廟宇。凡可以迓福凝庥者。靡不盡力爲之。閱數載。而胡氏傾人連舉二子。公喜甚。又念夫得子之晚。而深恐不親見其成立也。爲之延師課讀。以養其材。納粟成均。以榮其身。公之用心。可謂苦矣。而天之所以報公之德者。亦不爲不厚矣。公之姪化松。本才華。公第三子。公撫而育之。勝如己子。出處兄弟間。怡怡友愛。白首無間言。隣里咸稱道焉。以康熙戊辰年二月初九日生。至乾隆乙丑年卒。享壽五十八歲。子化槐。化杞。

文林郎英華公傳

公諱文彩。字英華。與兄鴻飛公學生。狀貌絕類。外人往往莫辨。束髮受書。通大義。值時事艱難。棄而力耕。喜賓客。好施捨。計田中每歲入。蔬布疋自給。餘悉以餉客。遇人方窘急。輒設法周濟。或代出名立券。後雖賠息償。無怨悔。有譚世民者。僑寓村中。聞公好善。因以急需告公。爲代借數十金以應。已而譚挈家逸去。公設措代還。越數年。有自金堂來者。云譚在其處。公置不問。其陰德長厚類如此。公天性過人。孝友純篤。兄弟之間。歡然無間。分居析產時。公重自損抑。田取其遠而瘠者。地取其不毛者。謂少服於是。不須更易。祖遺舊屋。讓歸長房。偕鴻飛公另自營屋而居住。鄉黨侃侃直言。爲人排難解紛。悉悅服。又度量豁達。不

與人較是非。遇有非禮相干之事。旁人代爲不平。公付之一笑而已。晚年喜植花卉。尤嗜讀書。當天朗氣清時。手一編坐北窗下。披涼風。謂羲皇上人無以過。又或攜斗酒至河干。或垂釣。且釣且酌。放懷自適。視人世繁華。詭治如無有也。公性仁於愛物。而廉於自奉。長子化楠遊宦浙江。公誡之曰。吾家世本布衣。今遭逢聖主。得叨一命。幸矣。惟做好官。可以報答國恩。要做好官。必以清爲主。我雖老。粗衣淡飯。尙自不缺。無需祿養。爾其勤勞王事。毋玷清白。以辱祖宗。化楠謹遵教不敢忘。乾隆十九年。以子貴。勅封公爲文林郎。餘姚縣知縣。元配趙氏。勅封孀人。公生于康熙戊辰。卒于乾隆丁丑。享壽七十歲。子三。化楠。化梗。化樟。

祭前任羅江邑侯沈公文

名傳花縣。羣歌匝地。陽春澤被。雷風共沐。隨車甘雨。訪惠政於長葛。慈父名高。仰卓識於黃浮。神君譽美。他如榆次之鳳。因荀藐而來。粵若香泉之鸞。以王阜而至。此皆常德吉人之驗。何勝樂只君子之思。然而鄧侯不留。少卿易老。桐鄉郭外。誰起朱邑於九原。犍爲塚邊。難覓張君於百歲。雖復奉嘗不絕。而華穀已虛。固知茂績常昭。而鳴絃何往。悲騰四境。淚洒千家。我邑侯亦昭公。望發武康。系由朐季。休文之著作。引紙則數千言。雲卿之才華。撐腸者五千卷。趨庭有訓。岐嶷總角之年。棄繻何人。抗慨壯遊之目。以故文足華國。蔚爲盛世之宗。因之學業匡時。允副閭閻之望。圭璋器重。河嶽聲高。茶陰爲小試之鄉。序碑立就。靜南乃榮擢之地。鳧舄邁飛。薄繭絲爲保障。寓撫字於催科。徵賦則不事追呼。乍濟積欠。委運而何辭艱險。

屢涉江干。爰以宏才。膺茲劇邑。寇公旣借。如聞父老之歌。郭守忽來。曷禁兒童之逐。蓋聞之舊治。久仰仁風。故樂此新遷。萃沾惠露也。而公振衰起廢。剔弊釐奸。念耕桑乃民命。攸關宜勤力作。思學校爲士習所係。務獲良師。於是手定農書。處處一犁春雨。親延名宿。人人半壁青燈。正直則西門之投巫。神明亦不其之伏虎。挽舟示德。赤子心傾。折獄維良。縣妖膽破。詢民間之疾苦。噢咻時聞。順風土之便安。勤勞備至。嚴查保甲。家無犬吠之驚。禁絕呼盧。人絕樗蒲之戲。稅桑田而靈雨霑足。旱魃無災。樂泮水而鐘鼓維新。於論有頌。捐金除道。遵王路之蕩平。造舟爲梁。利行人之攸涉。儉約則廐中齋馬。元叔之故事依然。清廉則水底投書。孔翊之遺風斯在。凡諸干政。堪擁百城。大抵山陰傅家。世傳有治縣之譜。抑亦江東岑令。原不愧棠棣之碑。方之元魯山之高行。不是過焉。擬諸陳太邱之善化。蔑以加矣。無如百年易盡。幻質非堅。游水亭邊。方蔭棠樹。芙蓉城裏。旋墜福星。嗚呼。得聖之和。不煩別訪長生之藥。惟仁者壽。自應優游不死之亭。况如公者。當耆艾之齡。老而愈健。履功名之際。貴以彌溫。正宜永祝夫岡陵。何遽上征乎寥廓。雖賈名鄭字之感。永矢弗忘。而召父杜母之思。長此何極。自今庭中柏秀。擬萊公之重來。桑下雉馴。訝魯君之奚往。對遺編而增歎。涕泗無從。覽故蹟而興悲。傷懷未已。靈輓莫逮。聞訃心驚。清醕抒誠。臨筵意戚。早知麗燦蛟龍之句。莫罄殊勳。然而高蟠鳳皇之文。無非實績。興歌薤露。敬奠椒漿。願福德冥施。長念紋江之編戶。祈威神陟降。無忘桐邑之黔黎。

李石亭文集卷六

文林郎英華府君行述

嗚乎痛哉。府君其竟逝耶。其竟舍不孝化楠等而長逝耶。不孝化楠自辛未之夏。拜辭府君入都候選。卽奉命發往浙江。補授餘姚縣知縣。計離府君膝下。七歷寒暑。一官匏繫。不能侍奉晨昏。而由川至浙。計程八千里。加以瞿塘三峽之險。欲求迎養不可得。欲暫歸省視又不可得。是負罪深重已極。今日昊天不弔。降此鞠凶。不孝化楠雖萬死不足以贖。尙何嗷嗷於人世耶。然獨念府君生平碩德殊行。卓口可表。不孝化楠等深恐後無所考。遽至失傳。是益不孝通天之罪也。爰忍死須臾。以淚和墨。略陳梗概。冀當代大人先生採擇焉。府君天性孝友。處兄弟之間。歡然無間。不孝化楠年十七八時。府君始與伯父別財而居。府君重自抑損。田取其遠而瘠者。地取其不毛者。祖遺老屋。讓歸長房。府君另自營屋而住。於時親戚鄉里。莫不多府君之能讓。謂足以愧世之同室操戈者。不孝等遵而守之。至今兄弟同爨。內外一心。未敢言分析。蓋一秉府君之教云。府君幼年讀書未成名。居鄉以耕讀課子。蔬布僅足自給。然喜賓客。好施捨。遇人窘急。輒設法救濟。或身自疏券代貸。後雖倍息償之。無怨悔。憶有譚某者。僑寓村中。聞府君好義。因以急需告。府君爲代借數十金以應。已而譚某挈家逸去。府君鬻產代還。越數年。有自金堂來者。云譚某在其處。府君不問也。其陰德長厚類如此。府君閒居喜讀書。手不釋卷。與客談論。歷數往古事。瞭如指掌。爲人

謀畫料度事理無不曲中鄰里有忿爭府君爲之排解無不悅服度量豁達不與人較是非遇有非理相干之事旁人代爲不平府君付之一笑而已治家嚴正雖燕息之地詞色未嘗少假不孝化楠自六歲時府君命受學於志遠范老師經十三年乃補博士弟子員其時躬自耕作以供修脯不孝化楠每一歸省必令將館中所作文呈閱以爲學進止之驗升階王太先生府君受業師也長於詩文好接引後學適自綿竹至府君爲設榻坐太先生於堂將不孝化楠扁空宅中卽以其時考試題命爲文文成不中肯府君大不懌候太先生去則將不孝化楠授以夏楚曰有子如此願自今毋復相見也不孝化楠涕泣歸館於是發憤力學始有進境自是後府君見不孝化楠所爲文乃稍稍色喜不孝化楠食廩餼後四載棘闈俱被黜府君曰售世之文必有傳授爾曷遠求海內名宿師之家中事有我在爾毋顧也不孝化楠於是捐棄一切受業於邑侯今陞西安太守坦齋王公公爲不孝化楠指示秘笈閱口載卽得與選拔中鄉試捷南宮皆府君擇師之明驗也府君性耽幽靜不尙紛華平居所喜皆利人之事故凡橋梁道路無不葺力助修至於浮屠陰果概不崇信朝夕無事亦未嘗誦佛持齋晚年所誦惟文昌孝經謂其切於日用常行可以型家可以勸世也凡山明水秀之區府君未嘗不到花香鳥語之時府君未嘗不遊及或寄興江湖則攜斗酒至河干垂釣且釣且酌徜徉詠歌放懷自適絕不知人世間有何繁華艷冶之可羨者家本居鄉不通市鎮而遠近聞府君名無論識與不識皆曰此盛德長者邑侯沈公諱潛浙江秀水人爲政精明尤好獎勵人物聞府君有隱德下車未幾卽造廬相訪款洽暢談越宿乃去其見重如此府君性耿介於

外物泊然無所好。而於貨利尤絕口不言。居平不肯受人一錢。卽有所餽遺。府君亦棄置勿顧。方不孝化。楠拜辭府君入都時。府君誠之曰。吾家世本布衣。今遭逢聖主。得叨一命。幸矣。惟做好官。可以報答國恩。要做好官。必以清爲主。我雖年老。粗衣淡飯。尙自不缺。無需祿養。爾其勤勞王事。毋玷清白。以辱祖宗。不孝化楠跪而受教。服官之日。早夜冰兢。惟恐失墜。今年二月。恭逢府君七旬大慶。不孝化楠因循縣署。未能乞養。不孝化樟亦奉府君命來浙佐理。惟不孝化樟侍府君左右。於時公卿大夫並浙之紳士。均有詩歌稱祝。彙成一集。名鴻案珠圍。以紀一時之盛。不孝化楠於八千里外。遣使恭問起居。且代稱觥。並述數年間所爲。冰兢自持。不敢違棄家訓者。一一爲府君道其略。府君顧而樂之。諭使人曰。吾年老善飯。精神猶昔。歸語吾兒。毋以我爲念。惟勉爲好官。吾願畢矣。嗚乎痛哉。孰意使以四月旋。而府君遽以七月逝乎。又孰意臨別之訓。遽成永訣之言乎。不孝化楠家山望斷。血淚將枯。五內摧傷。呼號莫及。已矣。長此不得再見府君之面。永爲不孝罪人矣。嗚乎痛哉。府君姓李氏。諱文彩。字英華。世爲羅江人。兵燹後。譜系散亡。自曾王父而上。靡得而詳焉。曾王父諱厚。家居羅江之雲龍壩。先生王父美實公諱攀旺。遭吳逆之亂。先王父避地石泉縣深山中。平定後乃出。同先王母李氏居河村。繼又遷南村。今爲南村李家灣云。乾隆甲戌。不孝化楠於餘姚任內。援例以請。先王父美實公馳贈文林郎。王母李氏馳贈孺人。王父生三子。長才華公。諱文彪。次庠生鴻飛公。諱士達。又次則府君也。府君與鴻飛公學生。狀貌絕類。外人往往莫辨。鴻飛公先府君十四年卒。府君生於康熙戊辰年二月初九日。慘於乾隆丁丑年七月二十日某時。以疾終於

四川原籍正寢享壽七十歲先於甲戌年九月府君勅封文林郎餘姚縣知縣元配吾母趙氏與府君同庚長一月勅封孺人生不孝兄弟三長不孝化楠壬戌科進士初任浙江紹興府餘姚縣知縣調任嘉興府秀水縣知縣原娶羅氏本縣諱兆鰲公長女繼娶吳氏廩膳生月生公諱廷桂女次不孝化榘監生娶梁氏綿州諱之佐公女次不孝化樟庠生娶孟氏本縣庠生睿周公諱乾智第三女生女一適本縣羅諱振鰲公之子越孫男四長調元廩膳生娶本縣近陽胡公諱昇第五女次學元幼業儒聘安縣舉人原任福建鳳山縣知縣熊諱琴字太和公嫡孫女國學生諱以恆公第四女俱不孝化楠出次卅元幼業儒聘安縣舉人原任福建鳳山縣知縣太和公嫡孫女國學生諱曰復公次女次繼元幼聘綿州增監生文淵何公諱涵第四女廩膳生何諱人麟胞妹俱不孝化樟出孫女五長適本縣庠生曹諱元英公次孫諱秉忠長子學文二字本縣冉諱子才次子不孝化榘出三字本縣國學生冉諱子建長子不孝化樟出四字綿州增生何諱涵第四子不孝化楠出五字安縣國學生熊諱以恆第二子不孝化樟出曾孫一小名竹官甫三歲調元出不孝等苦塊荒迷語無倫次倘蒙大人先生錫之誄銘以光泉壤則不孝等死且不朽。

宜人趙太君行述

嗚乎痛哉不孝化楠自庚辰夏初離母膝下自是四年奔走宦途既不得親奉菽水以娛暮年又不能解組歸田少遂烏私每一懷想百端交集以及於今遘遭大變嗚乎終天之恨尙有窮哉母在不能親養沒

不能親歿。焚焚在疚。不可爲人。不可爲子。結恨昏憤。雖欲執筆述吾母生平淑德懿行。何能詳盡。惟就所記憶。略陳梗概。冀當代大夫先生採擇焉。吾母姓趙氏。先世中江縣人。後遷居羅江北門外。遂爲羅江望族。先外祖生吾母姊妹二人。母居次。自幼端重。寡言。嫻習女工。慎容止。舉動皆有法度。長歸我先君英華公。時家計頗艱。先君竭力耕田。以奉我先王母。吾母是時內主中饋。井臼自操。外則饁餉田間。以助我先君。雖處勤苦。或人所不堪。而吾母怡怡然也。先君爲人豁達光明。喜賓客。好施捨。人有急難相求者。自顧無可資助。輒爲稱貸以應。其人力不能償。先君代爲償之。終無德色。吾母每歲蠶絲紡績。稍有餘積。於己衣食之用。皆極儉陋。未嘗肯費。及以供先君周急扶危。則慷慨出之。毫不吝惜。鄉人謂吾先君之德施。亦賴內有資助成之也。其事先王母承顏順志。供奉甘旨。備盡孝道。處妯娌之間。雍容和氣。未嘗一言相忤。教子極嚴。尤重讀書。不孝化楠及不孝化樺。自六歲出就傅後。稍有意惰。必加呵斥。從不稍爲寬假。歲辛酉。不孝化楠舉於鄉。壬戌成進士。又十年。始之官浙江餘姚縣。迎吾母在署侍奉。時先君以不孝化楠任所乏人。遣不孝化樺到署助理事務。而自督不孝化樺在家主持家事。故迎養時。獨吾母來宦署。到署後。目擊不孝化楠政務繁多。備極辛苦。輒多方慰勞。餘姚積疲之後。公事廢弛。訟棍奸胥。牢不可破。不孝化楠極力整頓。少立嚴威。吾母聞之。爲訓誡曰。救弊去其太甚。疾惡無過嚴。革弊無過猛。汝其勉之。不孝化楠跪而受教。居一年。吾母以南方卑濕。水土不習。決意還家。不孝化楠乃遣不孝化樺買舟侍母回。越二乞。先君卽世。不孝化楠在秀水縣調任內。聞訃後回里。與不孝化樺侍吾母居喪。及服闋。不孝化楠

例應入都候補。念吾母壽逾古稀，雖健不足恃，遲留不敢行。吾母促至再三，且訓之曰：汝父勤勞一生，教子成名，汝當盡心竭力，以報國恩。此汝之分也。我年老之人，在家較樂，不願來汝任所矣。但願汝成汝父之志，卽所以慰我心也。嗚乎！不孝化楠豈意此一出，遂與母永訣耶？吾母生平不喜誦佛經及持齋，嘗謂人曰：心好不用齋，性寬和，逮下有恩，好儉樸，嘗衣素布。不孝化楠所進綾緞等衣，不過歲月一用之而已。且謂不孝化楠等曰：汝家故田家也，華麗豈所安乎？閒居無事，卽躬紡績，至老不倦。蓋吾母自少卽親執家苦，其後訓子成立門戶，以至於老，然終未嘗安享一日奉養之美也。痛哉痛哉！吾母生於康熙戊辰年正月十一日亥時，卒於乾隆癸未年七月二十四日巳時，享壽七十六歲。爲我先君英華公原配。乾隆十八年，不孝化楠任餘姚時，荷蒙國恩，先君勅封餘姚縣知縣。吾母勅封孺人。先君先吾母六年卒。子三，長不孝化楠，壬戌科進士，現任天津府同知兼攝涿州知州事。娶羅氏，本邑兆鰲公長女。以子調元官內閣中書舍人。乾隆二十七年，恭遇覃恩，晉贈宜人。繼娶吳氏，綿州廩貢月生公女。恭逢覃恩，晉封宜人。次不孝化樞，監生。娶梁氏，綿州之佐公次女。繼娶梁氏之佐公第四女。次不孝化樞，庠生。娶孟氏，本邑庠生睿周公第三女。女一，適本邑振鰲羅公之子越孫男六。長調元，癸未科進士，現任翰林院庶吉士。前內閣中書舍人。娶本邑庠生近陽胡公第五女。乾隆二十七年，恭遇覃恩，勅封孺人。次潭元，業儒。聘安縣原任福建鳳山縣知縣太和熊公嫡孫女。太學生豐來公第三女。俱不孝化楠出。次鼎元，業儒。聘原任福建鳳山縣知縣太和熊公嫡孫女。太學生坡山公第二女。次繼元，聘覃恩勅封劍州訓導修職郎文淵何公。

第四女。現任劍州儒學訓導何人麟胞妹。次本元。幼未聘。俱不孝。化禱出。次擊元。幼未聘。不孝。化榷出。孫女五。長適本邑秉忠曹公子庠生錫寶。不孝。化楠出。次適本邑子才冉公次子志信。不孝。化榷出。第三字本邑太學生子建冉公子志清。第四字本邑庠生慕堯陳公子倫。俱不孝。化禱出。五字勅封修職郎文淵。何公第四子人鳳。不孝。化榷出。曾孫二。長朝礎。次朝磐。俱幼未聘。曾孫女二。長字現任劍州訓導何人麟。長子可如。次幼未字。俱調元出。不孝等。苦塊荒迷。語無倫次。惟當代大人先生憐而賜之銘誄。則不孝等死且不朽。



三十年五月五日
該書店

編主五雲王

編初成集書叢

集文亭石李

中華民國二十八年十二月初版

著作者 李化楠

發行人 王雲五
長沙南正路

印刷所 商務印書館

發行所 商務印書館
各埠

(本書校對者殷師竹)

G一六九四上

密



33
4
2514